



UNIVERSITÄTS-
BIBLIOTHEK
PADERBORN

Magnum Bullarium Romanum, Seu Ejusdem Continuatio

Quæ Supplementi loco sit, tum huicce, tum aliis quæ præcesserunt
Editionibus, Romanæ, & Lugdunensi ...

Ab Alexandro VII. Ad Clementem X.

Luxemburgi, MDCCXLII.

XXXVI. Erectio Congregationis Indulgentiis, & sacris reliquiis præpositæ.

[urn:nbn:de:hbz:466:1-74833](https://nbn-resolving.org/urn:nbn:de:hbz:466:1-74833)

XXXVI. Erectio Congregationis Indulgentiis, & sacris reliquiis præpositæ.

C L E M E N S P A P A I X.

Ad perpetuam rei memoriam.

Proceum.

IN ipsis Pontificatus nostri primordiis, cum multas Venerabilium fratrum nostrorum S. R. E. Cardinalium Congregationes ad certarum rerum & negotiorum in amplissimam Romanæ Curie alveum ex omnibus Mundi partibus assidue confluentium tractationem, atque determinationem à fel. record. Romanis Pontificibus prædecessoribus nostris, ad Ecclesiæ Catholicæ, ac Ditionis temporalis ejusdem S. R. E. utilitatem prudenti, salubrique consilio institutas reperissemus, quæ incumbente Nobis ingentem curarum molem pro sua quaque parte sublevarent; nullam tamen adhuc erectam videremus, quæ sacri Indulgentiarum thesauri curæ, & dispositioni, sacrarumque reliquiarum recognitioni, disquisitioni, & rectæ dispositioni peculiariter incumbere.

Erectio de qua in rubrica.

§. 1. Nos eundem inestimabilem thesaurum fidei dispensatione erogare, & omnia quæ sacras reliquias hujusmodi contingunt, rectè atque ordine disponere cupientes, nonnullos ex memoratis Cardinalibus, ac aliquos Curie prædictæ Prælatos, aliosque viros religione, pietate, doctrina, & rerum usu eximie præditos selegimus, quorum consilio, opera, & industria tam gravem muneris nostri partem ad omnipotentis Dei gloriam, Ecclesiæ honorem, ac spirituales Christi fidelium ædificationem facilius implere valeremus. Hi verò subinde, prout rerum & negotiorum momenta postulabant, insimul convenientes, commissam sibi à nobis provinciam rectè, & fructuosè, atque ex animi nostri sententia hæcenus administrarunt. Quapropter sperantes in Domino non minus utiliter in futurum quoque defudaturam esse eorum industriam, ac salubris consilii quod auctore Deo suscepimus, fructum, eodem adjuvante, atque incrementum dante, perennare desiderantes.

§. 2. Motu proprio, ac ex certa scientia, & matura deliberatione nostris deque Apostolicæ potestatis plenitudine Congregationem ejusdem S. R. E. Cardinalium, ac Prælatorum, & aliorum virorum prædictorum à nobis, ut præfertur, electorum, & deputatorum, ac in futurum tam à nobis, quam à Successoribus nostris Romanis Pontificibus eligendorum, & deputandorum, cum facultate omnem difficultatem, ac dubietatem in Sanctorum reliquiis, aut Indulgentiis emergentem, quæ ad fidei dogma non pertineat (nobis tamen, & Romano Pontifice pro tempore existente circa graviora, difficilioraque consultis) expediendi; Ac, si qui abusus in eis irrepserint, illos, judicii forma planè postposita, corrigendi, & emendandi; causas vero judicialem formam requirentes ad proprios Judices remittendi: Falsas apocryphas, indiscretasque Indulgentias typis imprimi vetandi, impressas recognoscendi, & examinandi, ac ubi nobis, seu Romano Pontifici pro tempore existenti retulerit, nostra seu illius auctoritate rejiciendi; Reliquias de novo inventas, quas rec. mem. Innocentius Papa III. prædecessor noster in Generali Concilio Lateranen. publica veneratione coli, nisi prius auctoritate Romani Pontificis approbatas, prohibuit, recognoscendi quoque, & examinandi; Ac in concedendis Indulgentiis, Sanctorumque reliquiis donandis moderationem adhiberi, omniaque piè, sanctè, & incorruptè fieri curandi tenore præsentium perpetuò erigimus, & instituimus.

§. 3. Decernentes easdem præsentem literas

semper firmas, validas, & efficaces existere, & fore, suosque plenarios, & integros effectus sortiri, & obtinere, nec de subreptionis, vel obreptionis, aut nullitatis vitio, seu intentionis nostræ, aliove quolibet, etiam substantiali, & formali, ac incogitato, & inexcogitabili, necessariamque expressionem requirente defectu notari, impugnari, infringi, retractari, in controversiam vocari, aut ad terminos Juris reduci ullo modo unquam posse.

§. 4. Sicque & non aliter in præmissis per quoscumque Judices ordinarios, & delegatos, etiam causarum Palatii Apostolici Auditores, ac S. R. E. prædictæ Cardinales, etiam de latere Legatos, & alios quoslibet, quacumque præminentia, & potestate fungentes, & functuros, sublata eis, & eorum cuilibet quavis aliter judicandi, & interpretandi facultate, & auctoritate judicari, & definiri debere, ac irritum, & inane, si quid secus super his à quoquam quavis auctoritate scienter, vel ignoranter contigerit attentari.

§. 5. Non obstant quatenus opus sit nostra, & Cancell. Apostolicæ Regula de Jure quæsito non tollendo, aliisque Apostolicis, ac in universalibus, provincialibusque, & synodalibus Conciliis editis generalibus, vel specialibus Constitutionibus, & Ordinationibus, necnon quibusvis, etiam juramento, confirmatione Apostolica, vel quavis firmitate alia roboratis, statutis, & consuetudinibus, etiam immemorabilibus; privilegiis quoque, Indultis, & litteris Apostolicis quibusvis personis, & locis sub quibuscumque verborum tenoribus, & formis, ac cum quibusvis, etiam derogatoriis derogatoris, aliisque efficacioribus, efficacissimis, & insolitis clausulis, irritantibusque, & aliis decretis, in genere, vel in specie, seu alias quomodolibet in contrarium præmissorum concessis, confirmatis, & pluries innovatis. Quibus omnibus, & singulis, etiam si pro illorum sufficienti derogatione de illis, eorumque totis tenoribus specialis, specifica, expressa, & individua, ac de verbo, ad verbum, non autem per clausulas generales idem importantes, mentio, seu quævis alia expressio habenda, aut aliqua alia exquisita forma ad hoc servanda foret, tenores hujusmodi ac si de verbo ad verbum, nihil penitus omisso, & forma in illis tradita observata exprimerentur, & inferrentur, præsentibus pro plenè, & sufficienter expressis, & insertis habentes, illis aliis in suo robore permanentibus, ad præmissorum effectum hac vice dumtaxat specialiter, & expressè derogamus, cæterisque contrariis quibuscumque.

§. 6. Volumus autem, ut earundem præsentium litterarum transumptis, seu exemplis etiam impressis manu alicujus Notarii publici subscriptis, & sigillo personæ in Ecclesiastica dignitate constitutæ munitis, eadem prorsus fides in judicio, & extra habeatur, quæ haberetur ipsis præsentibus, si forent exhibitæ vel ostensæ.

Datum Romæ apud S. Mariam Majorem sub Annulo Piscatoris, die 6. Julii 1669. Pontificatus Nostri Anno tertio.

Anno à Nativitate D. N. Jesu Christi 1669. In ditione septima, die verò 10. mensis Julii, Pontificatus autem Sanctissimi in Christo Patris, & D. N. D. Clementis Divina providentia Pape IX. anno tertio, supradictæ litteræ affixæ, & publicatæ fuerunt ad valvas Basilicæ Lateranen. Principis Apostolorum S. Mariæ Majoris de Urbe, in acie Campi Floræ ac aliis locis solitis, & consuetis Urbis per me Laurentium Barbigionum Sanctiss. D. N. D. Pape Curs.

Alexander Albritius Curs. Mag.

Clausula sublata.

Contrarium derogatio.

Transumptorum fides.

Dat. P. An 3. die 6. Julii.

Clausulæ præservati-
væ.